

INUIT ATAQATIGIIT INATSISARTUNI



30. august 2026

UKA26/297

Naqqiut

Siunnersuut 13. august 2026-meersoq taarserpaa

Inatsisartut Suleriaasianni § 33 naapertorlugu aalajangiiffigisassatut siunnersuut matumuuna saqqummiuppara:

Naalakkersuisut nuna tamakkerlugu illoqarfinni nunaqarfinnilu tamani namminersorlutik inuussutissarsiortut pisortallu sulisoqarneranni piginnaasatigut pisariaqartitat pillugit arlaannaanulluunniit attuumassuteqanngitsumik misissueqqissaarnisamik peqquneqarnissaannik Inatsisartut aalajangiiffigisassaattut siunnersuut. Misissueqqissaarnerup suliffeqarfiit piginnaasanik pisariaqartitaat qulaajassavai kiisalu nunatsinni ilinniarsiit ilinniakkanik pikkorissarnermillu neqeroorutaasa naleqqussarneqarnissaannut salliutinneqarnissaannullu tunngavissiissalluni. Misissueqqissaarneq kingusinnerpaamik UPA 2028-imi Inatsisartunut saqqummiunneqassaaq.

(Inatsisartunut ilaasortaq Nivi Heilmann Efraimsen, Inuit Ataqatigiit)

Tunngavilersuut

Kalaallit Nunaat ukiuni aggersuni inuiaqatigiinnut pingaarutilinnik annertuunillu suliassa qarpoq. Ineriartorneq pisortat namminersorlutillu inuussutissarsiortut suliassa qarfiini annertusiartuinnartunik piunasaqate qarpoq, taamaattumillu inuiaqatigiinni suliassat taakku naammassineqarnissaat eqqarsaatigalugu pisariaqartinneqartunik suliamut tunngasunik piginnaasaqarnissaq aalajangiisuusumik pingaaruteqassaaq.

Inuit Ataqatigiit sulissutigaa Kalaallit Nunaat akisussaassuseqartumik, alloriartuaartumik isumannaatsumillu ineriartornikkut namminersulivinnissaa. Tamanna anguneqassappat nunatsinni inuiaqatigiinnut suliassanik amerlanerusunik qaffasissumik piginnaasaqarluni isumaginnissinnaanermut pisariaqartinneqartunik piginnaasanik ineriartortitsillunilu attassiinnarnissaq pingaaruteqarluinnarpoq. Taamaattumik politikkikkut aalajangiinerit ilisimasatigut tunngavissaqarluarnissaat pisariaqarpoq.

Taamaattumik Inuit Ataqatigiit isumaqarput namminersorlutik inuussutissarsiortut pisortallu sulisoqarneranni nuna tamakkerlugu illoqarfinni nunaqarfinnilu tamani piginnaasatigut pisariaqartitat pillugit namminersortumik misissueqqissaarnermik ingerlatsinissaq pisariaqartoq. Sulisartut pillugit ilinniarsimasullu amerlassusaat pillugit kisitsisit pigineqaraluartut, Inuit Ataqatigiit isumaqarput Kalaallit Nunaanni maanna siunissamilu piginnaasatigut pisariaqartitat tamakkerlugit ersersinneqarnissaannut ataatsimut isiginnittumik periusissiamillu tunngaveqartumik ilisimasatigut tunngavissaq amigaataasoq.

Akuttunngitsumik innuttaasunit tusartarparput ilinniakkaminnik naammassinnereerlutik suliffissarsiortut suliffissarsiuminaatsitsisartut. Taamaattumik isumaqarpunga ukiut ingerlaneranni ilinniakkat pikkorissarnerillu suliffeqarfiit pisariaqartitaannut naammattumik naleqqussarneqartarsimannginnerat pissutaasinnaasoq.

INUIT ATAQATIGIIT INATSIARTUNI



Taamaattumik misissueqqissaarnerup takutittariaqarpaa nunatsinni aammalu illoqarfinni nunaqarfinnilu ataasiakkaani ilinniarsimasunik sulisussanik qanoq amerlatigisunik pisariaqartitsisoqartiginersaq. Assersuutigalugu nakorsat, ilinniartitsisut, sanasut, inatsisilerituut, aningaasaqarnermik ilisimasallit, ilisimatuut, isumaginninnermi perorsaasut, angalanermi aqutsisut (skipperit 1. grad), AC-mi fuldmægtigit il.il. qanoq amerlatigisut pisariaqartinneqarnersut qulaajarneqassaaq.

Ilisimasaq tamanna pisariaqarpoq nalilersorniarlugu nunatsinni ilinniakkat pikkorissarnerillu suut unitsinneqassanersut, suut pilersinneqassanersut imaluunniit suut sallinneqassanersut, taamaallilluni ilinniartitaanermut aqqissuussaq suliffeqarfiit pisariaqartitaannut ingerlaavartumik naleqqussarneqarsinnaaqqullugu aammalu innuttaasut ilinniagaqassusiat qaffassarneqaqullugu. Inuit Ataqatigiit isumaqarput tamanna Kalaallit Nunaanni imminut napatissinnaanerulernissamik anguniagaqarnermut qanimut attuumassuteqartoq.

Peqatigisaanik Inuit Ataqatigiit isumaqarput pisortat ingerlatsiviisa nukittuut innuttaasut suliannut piginnaasaqarluartunik sulisunik naapinneqartarnerannik tunngaveqartut. Taamaattumik misissueqqissaarneq Kalaallit Nunaanni piginnaasatigut tunngavimmik sivisuumik isigalugu ineriartortitsinnermut tapertaassanngilaq kisiannili aamma pisortat suliannik pitsaasumik naammassinnissinnaanerut, oqartussatut suliassanik suliannut naleqquttumik ingerlatsinissaat kiisalu innuttaasut inatsisitigut illersorneqarnissaat qulakkeerniarlugu iluaqutaassaaq.

Misissueqqissaarneq aammattaaq qulakkiissavaa siunissami ilinniartitaanermut tunngasut pillugit aalajangiinnerit Kalaallit Nunaanni piginnaasatigut pisariaqartitat pillugit uppersarneqarsinnaasunik paasissutissanik tunngaveqarnerullutik ingerlanneqarnissaat. Taamaattumik siunnersuut siunissami ilinniartitaanermut aqqissuussinnerup naleqqussarneqarnissaa ineriartortinneqarnissaalu pillugit periusissatigut aalajangiinnissamut tunngavissamik pilersitsinissamik siunertaqarpoq. Nunatsinni siunissami piginnaasatigut pisariaqartitat ataatsimut isigineqalerpata ilinniartitaanermut suliniutit pilersarusiorneqarsinnaapput, pisortat namminersorlutillu inuussutissarsiortut suliannut piginnaasaat nukittorsarneqarsinnaapput, oqartussatut suliannut suliannut naleqquttumik ingerlanneqarnissaat tapersorsorneqarsinnaavoq kiisalu akisussaaffeqarfiit siunissami tiguneqarsinnaasut pillugit paasissutissanik tunngaveqarluni akisussaassuseqartumillu salliussisoqarsinnaavoq.

Taamaattumik aalajangiiffigisassatut siunnersuut manna saqqummiunneqarpoq.

Pisortanut aningaasatigut allaffissornikkullu kingunerisassat

Siunnersuut akuersissutigineqarpat naatsorsuutigineqarpoq aningaasatigut allaffissornikkullu kinguneqassasoq, tassa AC-mi fuldmægtigip ukioq ataaseq sulineranik naleqassasoq aningaasanngorlugillu 500.000 kr.-it misaanni akeqassasoq. Tamatuma saniatigut naatsorsuutigineqarpoq paasissutissanik katersinnermut, misissueqqissaarinnermut aammalu avataaneersunik ikiorteqarnermut aningaasartuuteqartoqarsasoq, tamannalu suliariumannittussarsiortarnermi malitassat malillugit suliarineqassasoq. Naalakkersuisut suliaq qanoq suliarineraat apeqqutaalluni Nunatta iluani angalanermut aamma aningaasartuuteqartoqarsinnaassaaq. Aningaasartuutilli qulaani taaneqartut aningaasaliissutaareersut iluanni matussuserneqarsinnaanissaat naatsorsuutaavoq.

INUIT ATAQATIGIIT INATSIARTUNI



Namminersorlutik inuussutissarsiortunut aningaasatigut allaffissornikkullu kingunerisassat

Toqqaannartumik aningaasatigut imaluunniit allaffissornikkut kinguneqassanngilaq. Misissueqqissaarnerup ingerlanneqarnerani suliffeqarfiit attuumassutillit, inuussutissarsiortut kattuffii kiisalu suliffeqarnermi illuatungeriit attuumassuteqartut peqataatinneqarsinnaapput.

Innuttaasunut aningaasatigut allaffissornikkullu kingunerisassat

Toqqaannartumik aningaasatigut imaluunniit allaffissornikkut kinguneqassanngilaq.